

INDUSTRIKONSULENTEN PÅ OSTERØY

Årsmelding 2008

Vedteke i styringsutvalet 23.3.09

Forutan direkte oppdrag for etablerarar og bedrifter og sekretærfunksjonen for Osterøy Industrilag har følgjande oppgåver prega arbeidet i 2008: **sekretariat for Osterfjord Næringsamarbeid**, prosjektleiar for pilotprosjekt for å utløyse ei **bioenerginæring** i Hordaland, prosjektleiar for eit **robotiseringsnettverk**, sekretær for **kompensasjonsstyret** og sekretær for komiteen for fornying av **Osterøy vidaregåande skule** (nytt skulebygg, **Kompetansesenteret for CNC og robot** og etablering av **europaisk partnerskap** for kompetansesenter innan CNC og robot).

Industrikonsulenten har bistått ved oppfølging av 8 **skattefunnsprosjekt** i 2 Osterøy-bedrifter.

Talet på **nye oppdrag**, 24, var litt lågare enn føregåande år. Talet på **etableringsoppdrag**, 16, var også litt lågare enn året før. Ca 1/3 av desse nye etableringsoppdraga har resultert i **nye verksemder**. I dette talet er ikkje rekna med nyetableringar i 2008 i samband med oppdrag som er registrerte året før/tidlegare år.

I 2008 arbeide industrikonsulenten snautt 95% stilling med kombinert løn frå Industrikonsulenten og prosjektløn frå Osterfjord Næringsamarbeid.

Industrikonsulenten er **sekretær for Osterøy Industrilag**. Industrilaget har hatt mykje fokus på samferdsle/ ny veg mellom Hauge og Lonevåg, Arnatunnelen og riksvegutbetringar og å sikre tenleg industriareal. Industrilaget arbeider også for kompetanseutvikling, m.a. innan CNC og robot. Sjå eiga årsmelding.

Kommunen har gitt tilskott til Industrikonsulentverksemda også for 2008. Dette ligg inne i kommunen sitt langtidsbudsjett. Kommunen held kontor til Industrikonsulenten.

Me får tilskott på kr 35.000 frå **Hordland fylkeskommune** via **Osterfjord Næringsamarbeid** til næringsutviklingsarbeid. Osterfjord Næringsamarbeid har godtgjort arbeidet som sekretær for næringsamarbeidet med kr 70.000.

OPPDRAG

Forutan ein del oppdrag frå året før som det har vore arbeidd vidare med, har Industrikonsulenten altså fått

24 nye oppdrag i 2008. Dette er både reine kontakt- og informasjonsformidlingsoppdrag og oppdrag der konsulenten har gjort ein "jobb" for verksemda. Omfanget av oppdraga varierer frå oppdrag som vert løyste pr telefon til det største oppdraget som var på 38,5 timar.

Oppdraga var fordelte slik:

	2005	2006	2007	2008
Nye etableringsoppdrag	19	15	19	16
Nye oppdrag for etablerte verksemder	15	13	11	8
SUM	34	28	30	24

I tillegg til det som er registrert som "oppdrag", kjem ei rekkje kontaktar med verksemdene gjennom sekretærfunksjonen for Industrilaget og gjennom prosjektarbeid.

For dei fleste av etableringsoppdraga var ønsket om å ha ein "samtalepartner" utgangspunktet for kontakten. Von om gunstig "finansiering/tilskott" var utgangspunkt for nokre. Fleire tok kontakt for å få utarbeidd "næringsfagleg vurdering" som grunlag for støtte gjennom NAV. Det at det finst tilskottsordningar, er eit hjelpemiddel til å kome i kontakt med oppdragsgjevarane. Men det er svært få som oppnår å få tilskott. Skattefunnsordninga med skattefrådrag for utviklingsarbeid er ei bra ordning for veletablerte bedrifter, men det er no få som nyttar seg av ordninga.

Følgjande oppstilling syner korleis oppdraga er fordelte med omsyn til storleik på verksemdene:

Tilsette	Tal oppdrag
Nyetablering	16
1-4	1
5-9	1
10-19	2
20-49	1
50-100	3
SUM	24

50 % av oppdraga er komne i stand etter direkte initiativ frå kunden. Fleire oppdrag kjem som følge av at Industrikonsulenten er aktiv i næringslivet. Kva oppdrag Industrikonsulenten arbeider med, vert i stor grad styrt av dei som er initiativrike. Ved 50%

av oppdraga var første kontakt pr telefon og resten ved personleg møte. Oppdraga har vore frå 25 ulike etablerarar / verksemder. For 1 verksemd er det handsama 2 oppdrag og 2 av oppdraga var for 2 samarbeidande verksemder.

Oppdraga for **eksisterande verksemder** bransjefordelt:

Mekanisk industri	4
Anna industri	4
Tenester	0
SUM	8

I disse tala kjem ikkje med oppdrag for eksisterande verksemder som går over fleire år.

Etableringsoppdraga bransjefordelt:

Ulike former for tenester	8
Industri	2
Bygg og anlegg	5
Handel	1
SUM	16

Det er vanskeleg å seie kor mange verksemder det vert av desse etablerings-sakene, mange etableringar skjer over tid, men ca 1/3 har starta ny verksemd i løpet av året.

ANDRE SAKER INDUSTRIKONSULENTEN HAR ARBEIDD MED

Forutan å vera **sekretær for Osterøy Industrilag** (sjå eiga årsmelding) har Industrikonsulenten arbeidd med mellom anna følgjande oppgåver av meir generell karakter for Osterøy-næringslivet;

* Osterøy-næringslivet fekk **kompensasjon for auken i arbeidsgjevaravgifta** frå 1.1.2000 t.o.m. 2003. Industrikonsulenten er sekretær for kompensasjonsstyret. Kompensasjonsstyret har arbeidd aktivt for å bidra til realiseringa av ny **riksveg 567 Hauge – Lonevåg** og har ytt tilskott på ca 8 mill kr i kompensasjonsmidlar. Bompengefinansieringa vart godkjend i Stortinget i desember 2007 og i 2008 har Statens vegvesen førebudd byggestart. Kompensasjonsstyret har invitert til spleiselag for **vegomlegging på Bysheim ved hjelp av tunnelmassar**. Etter at **Osterøy Utvikling** vart avvikla pr 1.4.05, tok kompensasjonsstyret på seg å forvalte restmidlane på 1,65 mill kr. Det er brukt midlar i samband med vidareutvikling av Osterøy vidaregåande skule, m.a. innan feltet CNC og robot. Dette har gitt svært gode resultat, både m.o.t. nytt skulebygg som fylkestinget har vedteke å ha ferdig til skulestart i 2010 og utvikling av undervisningstilbodet. Industrikonsulenten har teke på seg sekretariatsfunksjonen for **"Komiteen for vidareutvikling av Osterøy vidaregåande skule"** som vart oppretta i 2005. Denne komiteen har gjennomført prosjektet «Kompetansesenteret for avansert maskinering, KAM» med Osterfjord

Nærings-samarbeid/ Industriksulenten som sekretariat. Prosjektet har i tillegg til midlar frå Osterøy Utvikling/ kompensasjonsstyret også fått midlar gjennom Regionalt Næringsfond for Osterfjord, frå fylket og ikkje minst gjennom innsats og gåver frå næringslivet. Det er engasjert 2 prosjektleiarar. Pr 1.1.2009 er Kompetansesenteret for CNC og robot formelt etablert som avdeling ved Osterøy vidaregåande skule. I tillegg til at det vert bygd ny verkstadhall for kompetansesenteret i samband med nytt skulebygg, er det skaffa ca 10 mill kr i finansiering av kompetansesenteret. Oppdatert informasjon vert lagt ut på www.rup.no, søk «avansert maskinering».

* Industriksulenten har for 2005-08 hatt **sekretariatsfunksjonen for Osterfjord Nærings-samarbeid**. Osterfjord Nærings-samarbeid vert finansiert m.a. med tilskott frå Hordaland fylkeskommune. Osterfjordregionen får også midlar via Hordaland fylkeskommune til **Regionalt næringsfond for Osterfjord**. Sjå eiga årsmelding.

* Ei viktig oppgåve i Osterfjord Nærings-samarbeid har vore gjennomføring av eit **utviklingsprosjekt for å utløyse bioenerginæringa i Hordaland**. På slutten av 2005 sette fylkestinget av ei ramme på 4 mill kr over 3 år til denne satsinga med Industriksulenten som prosjektleiar. Prosjektet vart i 2008 forlenga til ut 2010. Ved utgangen av 2008 var det att vel 1,5 mill kr av løyvinga. For oppdatert informasjon, sjå www.rup.no, søk «bioenerginæring».

* Industriksulenten har vore pådrivar for å få i stand ein **samarbeidsavtale mellom Osterfjord-regionen og Høgskulen i Bergen**. Avtale vart inngått 15.3.2007. Industriksulenten er gjennom Osterfjord Nærings-samarbeid leiar for samarbeids-utvalet som er oppretta.

* Industriksulenten har vore pådrivar for etablering av eit **nettverk for avansert bruk av robotar**. Innovasjon Norge har ytt tilskott på kr 300.000 til eit forprosjekt. Av 7 deltakarar er 4 Osterøy-verksemder samt Kompetansesenteret for CNC og robot frå Osterøy. Industriksulenten er engasjert som prosjektleiar.

* Industriksulenten har vore pådrivar for å søke **Leonardo da Vinci stipend** for ein **europaisk partnerskap innan kompetansesenter for CNC og robot, CaRPs**. Det er etablert kontakt mellom 11 partnerar i 5 land. Osterøy Industrilag er koordinator. Elles frå Noreg deltek Kompetansesenteret for CNC og robot og Mjøs Metallvarefabrikk AS. Frå Sverige deltek maskinforhandlaren RAVEMA. I Slovenia er 2 skular partnerar; den eine har også knytt til seg ei verksemd som "silent partner". I Tyskland er ein skule, ei verksemd og det internasjonale kontoret ved det tekniske universitetet i Ilmenau partnerar. I Litauen er ei verksemd og eit regionforskningsinstitutt partnerar. Instituttet har knytt til seg det tekniske universitetet i Kaunas som "silent partner". Det er søkt mobilitets-/reisestøtte på € 114.000 til det 2-årige

prosjektet. Svar på søknaden kjem til sommaren 2009.

* Industrikonsulenten er oppnemnd som regionane sin representant i **styret for programmet livOglyst** i regi av Hordaland fylkeskommune, Fylkesmannen i Hordaland, Innovasjon Norge og Sparebanken Vest. Dette er ei større, felles satsing for lokalsamfunnsutvikling og entreprenørskap. På Osterøy kom **Vener av Mjøsvågen** i 2008 med i programmet som eit utviklingsprosjekt.

MØTE, KURS, FOREDRAG

Forutan møteverksemd mm. i samband med ovan-nemnde kan nemnast:

- Gjest ved opningsfest for **Reppen barnehage** sitt nybygg.
- Fleire møte i regi av **Bergen Næringsråd** m.a. om næringsareal og i **Næringsalliansen**.
- Foredrag for NAV-tilsette om Kompetanse-senteret for CNC og robot.
- Skipa til og delteke ved **studietur for Osterøy Industrilag** til Tyskland.
- Lagt opp og delteke ved synfaring for **statssekretær Øyvind Slåke** i **Næringsdepartementet**.
- Delteke ved **næringsutviklingskonferansen** for Hordaland; "Slik gjer vi det".
- Lagt opp synfaring til **bioenergianlegg** på Osterøy for **Naturvernforbundet i Hordaland**.
- Delteke ved møte for **regionale tiltakskontor**.
- Delteke ved fleire tilskipingar i regi av **Innovasjon Norge Hordaland sitt mentorprogram**, m.a. avsparksamling i Oslo.
- Delteke ved møte om **breibandutbygging** på Osterøy.
- Delteke ved møte i regi av **NCE Subsea sin maskineringsgruppe**.
- Delteke ved **reiselivsmøte** for Osterøy.
- Foredrag om næringsstruktur og næringsutvikling for øk/adm-klasse ved **Høgskolen i Bergen**.
- Delteke ved møte i regi av NAV om tiltak for personar med psykiske lidningar.
- Delteke ved **bioenergimøte i Fusa**.
- Delteke ved møte på Gardermoen for **prosjektlearar for bioenergiprojekt**.
- Opningstale ved **Utdanningsmessa** i Osterøyhallen.
- Reiser til **Slovenia** og til **Tyskland** for førebuing av Leonardo da Vinci **partnerskap**.

STYRINGSUTVAL

Styringsutvalet har hatt følgjande samansetjing:

Formann : Lars Magne Byseim

Willy Helgesen, vara Jorunn Jacobsen
Svein Skulstad, vara Jostein Jacobsen
Ordførar Kari Forseid Aakre.

DØME PÅ SPØRSMÅL SOM INDUSTRIKONSULENTEN HAR HANDSAMA I 2008

- Me har fått hand om eit område som me vil utvikle som næringsareal, men me var for seine i høve til innmelding ved rulleringa av kommuneplanen. Kva gjer me?
- Me førebur søknad om bygging av eit elvekraftverk. Kan me få snakke med deg?
- Me ønskjer ein samtale med deg igjen for å drøfte vidareutvikling av bedriften.
- Me vil etablere verksemd innan grafisk design og web-design og vil gjerne snakke med deg.
- Me vil etablere gardsturisme, men får mange ulike råd frå "hjelpeapparatet". Kan me få snakke med deg?
- Me ønskjer i samråd med noverande eigar å finne ny eigar eller medeigar for bedrifta. Kan du hjelpe oss?
- Eg vil starte mi eiga bedrift og kan få behalde dagpengane hjå NAV. Dei seier eg kan spørje deg om å lage ei næringsfagleg vurdering.
- Kan du hjelpe oss med planlegging og søknader om finansiering av fleire nye utviklingsprosjekt?
- Kan du hjelpe oss med ein skattefunn-søknad?

REKNESKAP 2008

	Utgifter	Inntekter
Tilskott frå Osterøy kommune		150.000,00
Tilskott frå Osterfjord Nærings samarbeid		105.000,00
Sekretærgodtgjersle Industrilaget		40.000,00
Konsulenthonorar		185.797,00
Renter		43.484,07
Løn inkl sos utg*	444.756,50	
Revisjon	500,00	
Kontorkostnader	6.149,05	
Reise/diett elles	3.435,00	
Km godtgjersle	5.329,00	
Gebyr	109,00	
Overskott	64.002,52	
	524.281,07	524.281,07
Nordea 31.12.08	833.938,92	
Kundefordringar	281.687,50	
Skuldig arbeidsgj.avg.		1.092,
Skuldig mva		46.290,00
Eigenkapital		1.068.244,42
	1.115.626,42	1.115.626,42

* L Mjøs er også løna direkte frå Osterfjord Nærings samarbeid for prosjektoppgåver.

Kasserar: Lars Mjøs. Revisor: Norodd Helle

INDUSTRIKONSULENTEN PÅ OSTERØY

TIL DI TENESTE

FOR KVEN ?

Alle som driv eller har lyst til å driva næringsverksemd på Osterøy, har høve til å nytta Industrikonsulenten. Verksemda di eller planane dine kan vera frå dei minste til dei største og i alle bransjar.

KVA SLAG SPØRSMÅL ?

Alle typar spørsmål som har med næringsverksemd å gjera, kan rettast til Industrikonsulenten. Me vil anten kunne svara på dei sjølve eller finna fram til stader der du kan få svar. Alle opplysningar vert handsama fortruleg.

KVA KOSTAR DET ?

Tenestene til Industrikonsulenten er gratis dersom du er nyetablerar eller me treng kort tid for å finna svar på spørsmålet ditt. Dersom spørsmålet ditt krev meir arbeid, må du etter avtale betale ein timepris frå kr 450 til kr 550.

KVEN STÅR BAK ?

Det er Osterøy Industrilag som har teke initiativ til stillinga og tilsett Industrikonsulenten. Osterøy kommune støttar stillinga økonomisk og held kontor, telefon og breiband. Industrilaget betaler sekretærgodtgjersle og ein del inntekter kjem frå oppdrag me utfører for næringslivet og for Hordaland fylke. Ordføraren er representert i styringsutvalet for verksemda.

KVEN ER ME ?

Lars Mjøs har vore tilsett i deltids-stilling som Industrikonsulent sidan 1982. Han er utdanna sivilingeniør, maskinlina, ved Norges Tekniske Høgskule, no NTNU. Han har vidareutdanning innan undervisning og miljøvern, mellom anna arbeidsmiljøspørsmål.

Han har vore med å skrive boka "Fem små mekaniske verksteder" og boka "Grunnbok i bedriftslære".

Han har 1 års verkstadpraxis frå Nylands Mekaniske Verksted i Oslo før han tok til med utdanninga og han har arbeidd 2 år som skipsvinsjkonstruktør ved BMV, Hordvikneset. Han driv også eiga konsulentverksemd med etableraropplæring og nyskaping som spesialitet.

KORLEIS FÅ TAK I INDUSTRIKONSULENTEN ?

Ring direktenummer 56 19 22 70, mobil 416 28 531, faks 56 19 21 01. E-postadressa er; lars.mjøs@osteroyindustrilag.no . Du kan og vitje Industrikonsulenten i "bustaden" ved rådhuset på Hatland. Gi melding i servicekontoret i rådhuset dersom du ikkje får tak i Industrikonsulenten, så kontaktar han deg.

Nærare informasjon finn du på www.osteroyindustrilag.no/indkons